

Kalaallit Nunaanni atortussiassanit pisunik piiaanissaq siunertaralugu piiaanissamik misissueqqaarinissamillu suliaqarneq pillugu nalunaarut

Kalaallit Nunaanni suliffinni avatangiisit pillugit inatsimmi § 11 a, imm. 4, §13, imm. 3, § 15, imm. 2, § 29, § 33, § 35, § 37, § 39, § 49, § 56 aamma § 67, tak. inatsit pillugu nalunaarut nr. 1084, 26. oktober 2005-imeersoq naapertorlugit aalajangersarneqarpoq:

Kapitali 1

Atuuffia

§ 1. Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 2. december 2009-meersoq (aatsitassanut ikummatissanullu inatsit) malillugu akuersissutaateqartut nunami makkuninnga suliaqarnerat nalunaarummi matumani ilaatinneqarput:

1. nunap qaani iluanilu aatsitassanik piianeq,
2. aatsitassanik piiakkanik tunniussinissaq, imaanngitsoq aatsitassanik suliarinneqqaarneq siunertaralugu suliarinninneq, aamma
3. aatsitassanik taaneqartunik piiaanissaq siunertaralugu misissueqqaarneq, misissueqqaarneq maskiinanik atuinikkut nunap ajoquserneqarneranik kinguneqarpat.

Imm. 2. Nalunaarut manna sulianut Kalaallit Nunaanni suliffinni avatangiisit pillugit inatsimmi § 2, imm. 2, nr. 2-mi aamma 3-mi pineqartunut ilaatinneqartunut sulianullu sulisitsisoq sinnerlugu suliaannngitsunut aamma atuuppoq.

Imm. 3. Taamaattorli §§ 3-5, §§ 7-23, kiisalu §§ 39-46 sulisitsisoq sinnerlugu suliarineqartunut taamaallaat atuupput.

§ 2. Nalunaarut manna suliat Kalaallit Nunaanni suliarineqarnerat pillugu nalunaarummi, Kalaallit Nunaanni suliffiit aaqqissuunneqarnerat pillugu nalunaarummi, Kalaallit Nunaanni teknikkikkut iluaqusersuutit aaqqissuunneqarnerat, Kalaallit Nunaanni stoffit atortussallu pillugit nalunaarummi aamma Kalaallit Nunaanni suliffinnik naliliisarneq pillugu nalunaarummi aalajangersakkanut ilassutinik imaqarpoq.

Kapitali 2

Suliap pilersaarusiornera aaqqissuunneralu

Suliffinnik naliliisarneq

§ 3. Sulianik nalunaarummut matumunnga ilaatinneqartunik suliaqarnermi, Kalaallit Nunaanni suliffinnik naliliineq pillugu nalunaarut malillugu suliffinnik naliliineq makkuninnga aamma imaqassaaq:

1. Piiaffiup iluani sumi immikkut ulorianartoqarsinnaanersoq, soorlu

qaartoorsinnaaneq, ikuallattoorsinnaaneq, sullulianik nakkaattoorsinnaaneq, nakkaasoorsinnaaneq stoffinillu silaannarnilluunniit peqqissutsimut ulorianartunik toqunartunillu akulinnik peqarfiit eqqarsaatigalugit kiisalu immikkut ulorianarsinnaasut pinaveersimatinniarlugit iliuutsit suut iliuuserineqassanersut malinneqassanersulluunniit.

2. Illersuutit annaassiniarnermilu atortut naleqquttut atorineqarnissaannik ilitsersuutit. Immikkut iliuutsit iliuuserineqarsimasut malinneqartussalluunniit naliliinermi immikkut takuneqarsinnaassapput.
3. Suliffimmi ingerlatat immikkut ulorianaatillit qanoq ingerlanneqartarnissaannik sulinermi periaatsit malitassat, tamakkuninnga sulinerup taamaallaat akuersissuteqarnikkut ingerlanneqarsinnaanerani aalajangersagartalik.
4. Suliffiit tamarmik ataasiakkaarlutik malittarisassanik, sulinerup isumannaatsumik ingerlanneqarnissaanik qulakkeerinnittunik peqassapput. Malittarisassat taakku qimaaniarnermi aqutissanut takussutissianik, qimaaniarnermi annaassiniarnermilu atortunik ikiueqqaarnermilu atortunik atuneq pillugu paasissutissanik aamma ajornartorsiulermi suliffiulluunniit qanittuani suliniutinik sunik aallartitsisoqartussaanerani aalajangiussanik kiisalu annaassiniarnermik aqqissuussineq pillugu aalajangersakkanik imaqqassapput.
5. Qaqqap pineqartup assinga takussutissiaq paasiuminartunngorlugu suliaq. Takussutissiami sullulianut paaaffiusunullu takussutissiami ilassutit suut ingerlatsinermut isumannaallisaanermullu sunniuteqarsinnaasutut ilisimaneqartut takuneqarsinnaassapput.
6. Silaannarissaaveqarfinni qitiusumik pissutsit pillugit paasissutissat kiisalu qaartoorsinnaaneq aamma akuutissanit atortussanillu peqqissutsimut ulorianartunit nalaataqartitaanissaq pinaveersaartinniarlugu atortut suliniutillu allaaserineqarnerat.
7. Silaannaq gassimik ajoqusiisinnaasumik akoqarpat akoqarsinnaappalluunniit illersuutit atortut tigorianaat sumiinnerannik pinaveersaartitsiniutinillu sunik aalajangersaasoqarsimanerani allaaserinneq.
8. Ikuallatoqarsinnaanera pinaveersaartinniarlugu, sumi ikuallatoqarnera paasiniarlugu ikuallatorlu qatserniarlugu siaruatsaaliniarlugulu suliniutit suut suliniutigineqassanerisa allaaserineqarnerat.

Sulisitsisut arlallit akornanni suleqatigiinneq

§ 4. Suliffeqarfimmi nunamit allameersumi sulisut paaaffimmi sulippata, § 3 naapertorlugu naliliinermut ilassummi isumannaallisaaneq peqqissuserlu pillugit suleqatigiinneq qanoq aqqissuunneqassanersoq aalajangersarneqassaaq. Matumani isumannaallisaaniarluni suliniutinik ataqatigiissaarisooqarnissaa ilanngullugu qulakkeerneqassaaq, pisariaqarpallu sulinermi iliuuseqarnermilu ataatsimut malittarisassat aalajangersarneqassallutik.

Imm. 2. Ilasummi tassani suliffiup aqqissuunneqarnera ingerlanneqarneralu pillugit paasissutissat aammattaq ilanngunneqassapput, taamaalillutik sulisitsisut nunanit allaneersut sulinerminnik peqqussut manna aamma suliffinni avatangiisit pillugit inatsit

tunnngavigalugu pisussaaffitik eqqortillugit piareersaasinnaaqullugit ingerlatsisinnaaqullugillu.

§ 5. Suliffeqarfik nunamit allameersoq piiiaaffimmi sulinerminik aallartitsinnginnerani § 3 naapertorlugu naliliinerup ilai sulinermut pineqartumut attuumassuteqartut pillugit allakkatigut ilisimatinneqassaaq.

§ 6. Suliffeqarfiup namminerisaminik sulisoqanngitsup piiiaaffimmini suliamik nalunaarummi matumani pineqartunut ilaatinneqartumik suliaasiissuteqartup sulisitsisut sumiiffimmi tassani sulisoqartut suliffeqarfiup aaqqissuunneqarnera ingerlanneqarneralu pillugit paasissutissanik sulinerminnik peqqussut manna aamma suliffinni avatangiisit pillugit inatsit tunnngavigalugu pisussaaffitik eqqortillugit ingerlatsinissaannut pisariaqartunik pissarsisinneqarnissaat isumagissavaa. Matumani taakku sulisitsisut allat suliffimmi tassani ingerlataannik ilisimatinneqarnissaat qulakkeerneqassaaq, tamanna isumannaallisaaneq peqqissuserlu pillugit suleqatigiinnermut pingaaruteqarpat.

Imm. 2. Suliffeqarfiuttaaq suliffimmi tassani pissutsit isumannaatsumik sumiissusersiorsinnaanermut suliffimmi isumannaatsumik ingerlatsisinnaanermut pingaaruteqartut naleqquttumik periaaseqarluni paasissutissiissutigineqarnissaat isumagissavaa, soorlu allagarsiinikkut.

Nakkutilliineq attaveqatigiinnerlu

§ 7. Sulisut suliap ingerlanneqarnerani ulorianartunut illersorniarlugit, sulisitsisup taassumaluunniit toqqagaata suliffiit nakkutigissavai. Nakkutilliineq inunnit pisariaqarneratut misilittagaqartunit piginnaasaqartunillu ingerlanneqartassaaq, inuillu toqqaannartumik tikillugit attaveqarnikkut ingerlanneqartassalluni, teleli atorlugu attaveqatigiittoqarsinnaavoq.

Imm. 2. Suliffinnik inoqartunik nakkutilliineq minnerpaamik sulisut paarlaanneranni tamani pisassaaq. Suliffiit inoqartut tele atorlugu attaveqaateqanngitsut, minnerpaamik nalunaquttap akunneri marlukkaarlugit pisarnertut misissorneqartassapput.

Imm. 3. Suliffik avinngarusimasumiippat sulisumilluunniit ataasiinnarmik sulisoqarpat tele atorlugu attaveqatigiissinnaanissaq qulakkeerneqassaaq. Tele atorlugu attaveqatigiittoqarsinnaanngippat, allatigut attaveqatigiissinnaanissaq qulakkeerneqassaaq.

Imm. 4. Pisariaqartitamik ikiuiniarnerit, qimagussortitsinerit annaassiniarnerillu ingerlaannavik aallartissinnaajumallugit, attaveqatigiinnermut atortunik pisariaqartitanik peqartoqarnissaa sulisitsisup isumagissavaa.

Imm. 5. Inuit kikkut nunap iluaniinnersut takananilu suatungaaniissinnaanersut sukkulluunniit ilisimaneqarnissaata ajornannginnissaa sulisitsisup isumagissavaa.

Ilinniartitsineq ilitsersuinerlu

§ 8. Sulisut tamarmik ataasiakkaarlutik qanoq atorfinitsinneqarsimanertik qanorlu sivistigisumik sulisimanertik apeqqutaatinnagu sulinerup isumannaallisaanikkut peqqissutsikkullu tamakkiisumik illersorneqarsinnaasumik ingerlanneqarnissaanik naammattumik naleqquttumillu ilinniartinneqarlutillu ilitsersorneqartarnissaat sulisitsisup

isumagissavaa. Ajutoorsinnaanermut nappaateqalersinnaanermullu aarlerinaatit, suliamut attuumassuteqarsinnaasut, ilanngullugit sulinerup aaqqissuunneqarnera, suleriaatsit naleqquttut, teknikkikkut iluaqusersuutit ator neqartarnerat, ikiueqqaarnermi atortut ator neqartarnerat, inunnut ataasiakkaanut illersuutit, qimaanermi annaassiniarnermilu atortut ator neqartarnerat pissutsillu allat attuumassuteqartut pillugit paasissutissat tunniunneqassapput. Ilinniartitsineq ilitsersuinerlu pingaartumik pisunut makkununga atatillugu pisassaaq:

- 1) ator finitsitsiner mi
- 2) suliffiup iluani allamut nuutsitaanermi suliaassalluunniit allanngortinneqarnerini
- 3) teknikkikkut iluaqusersuutit atulersinneqarnerini allanngortinneqarneriniluunniit aamma
- 4) teknologimik nutaamik atuilernermi.

Imm. 2. Ilinniartitsineq ilitsersuinerlu taaneqartut ineriartortitsiner mut naleqqussarneqartassapput, ulorianarsinnaasut nutaat atuutilernerat ilanngullugit, pisariaqarpallu akuttunngitsumik uteqqinneqartassallutik.

Imm. 3 Ilinniartitsiner mut ilitsersuiner mullu taaneqartunut piffissap suliffiusup iluani ingerlanneqartussanut aningaasartuutit sulisitsisup akilertassavai.

Imm. 4. Sulisut nunanit allaneersut suliffimmi suliamik ingerlataqartut pissutsit isumannaallisaanermut peqqissutsimullu tunngasut sulinerminnut sunniuteqartut pillugit naleqquttumik ilitsersorneqarnissaat sulisitsisup qulakkiissavaa.

Imm. 5. Sulisunut isumannaallisaanermik ilitsersuutit, ajornartoornermi atortunik atuineq aamma pisuni ajornartoorfiusuni iliuusissat ilanngullugit, allaganngorlugit pigineqarnissaat pisariaqarneratullu annertutigisumik allagarsiinikkut saqqumitinneqarnissaat sulisitsisup isumagissavaa.

Inunnut ataasiakkaanut illersuutit

§ 9. Inunnut ataasiakkaanut illersuutit iluaqusersuutit naleqquttut sulisunut atugassiissutigineqassapput.

Imm. 2. Illersuutit iluaqusersuutit suliffimmiitsinneqassapput, atorsinnaalluarnerallu qulakkeerniarlugu akuttunngitsumik misissorneqartassallutik.

Imm. 3. Niaqorornaveeqqutit, isumannaallisaatit kamippaat atisallu mianersoqqussutitallit (sakkortuunik/ersarissunik qalipaattillit) tamatigut ator neqartassapput, sumiiffiit tamakkuninnga atuinissamut erseqqissumik pisariaqartitsiviunngitsut eqqaassanngikkaanni. Sulineq isumannaallisaanikkut peqqussutsikkullu tamakkiisumik illersorneqarsinnaasumik allatut pilersaarusiorneqarsinnaanngippat, piareersarneqarsinnaanngippat ingerlanneqarsinnaanngippallu inunnut ataasiakkaanut illersuutit iluaqusersuutit allat suliner mi ator neqassapput.

§ 10. Nunap iluani suliner mi sulisut qaammartartumik tigungmiartakkamik tamatigut nassataqartassapput, tak. § 15.

Kapitali 3

Suliffigisaq suliffillu

§ 11. Piiaaffimmi ingerlatat mianeralugit aamma suliffiup aaqqissugaaneranut malittarisassat kiisalu nalunaarummi matumani aalajangersakkat naapertorlugit piiaaffik illersorneqarsinnaasumik aaqqissuunneqarsimassaaq. Ilanngullugit qulakkeerneqassapput:

1. nunami atortut ikkussukkat pioreersut sulinerup aallartinneqannginnerani suussusersineqarnissaat misissorneqarnissaallu kiisalu pisariaqarneratut annertutigisumik isumannaallisarneqarnissaat erseqqissumillu nalunaaqutsersorneqarnissaat,
2. nunaminertami immikkut ulorianarsinnaasut sulinerup aallartinneqannginnerani suussusersineqarnissaat nalilersorneqarnissaallu pisariaqarneratullu annertutigisumik pinaveersaartinneqarnissaat erseqqissumillu nalunaaqutsersorneqarnissaat,
3. teknikkikkut atortut ikkussukkat pisariaqartut pilersinneqarnissaat piffissaagallartillugulu atuiffiusunut anngutsinneqarnissaat kiisalu pisariaqarneratut annertutigisumik nakkutigineqarnissaat / misissorneqarnissaat aserfallatsaalineqarnissaallu,
4. suliffiup ingerlaffiginera piffissami suugaluartumiluunniit pissutsit tamakkiisumik illersorneqarsinnaasut atuutsillugit pisinnaassaaq,
5. teknikkikkut iluaqusersuutit naleqquttut pisariaqarneratut annertutigisumik atornerqarsinnaanerit,
6. atortussat inissamut naleqquttumut aalajaatsumik toqqaveqartumut inissinneqarsinnaanerit,
7. sumiiffiit suleriaatsinik immikkut ulorianarsinnaasunik ingerlatsiviusut ingerlatsiviunermi peqatigitillugu sapinngisamik allanit suliffiusinnaannginnissaat angallaffiusinnaannginnissaallu,
8. atortulersuutit ikkussukkat, isumannaallisaanermik iliuutsitit taamaattoqarpallu immikkut ulorianarsinnaasut il.il. ingerlaavartumik nakkutigineqarnissaannut periaatsimik aalajangersaasoqarsimanissaa aamma
9. piffiit nakkaaffiusinnaasut imaluunniit nakkaanikut ungaluliinikkut, qalliinikkut allatigulluunniit naleqquttumik iliuuseqarnikkut qulakkeerneqarnissaat.

§ 12. Illut, piiaanermi atortulersuutitullu aaqqissukkat, teknikkikkut sanaartukkat ikkussukkallu allat, sulluliat, piiaavimmuut sulluliat, itersaliat, usilersorfissiat assigisaallu ilanngullugit, atornerqarnerat eqqarsaatigalugu illersorneqarsinnaasumik sananeqarsimassapput aaqqissugaassallutillu kiisalu illersorneqarsinnaasumik aserfallatsaalineqassallutik.

Imm. 2. Teknikkikkut atortulersuutit, iluaqusersuutit, ikkussukkat il.il. illersorneqarsinnaasumik inissinneqassapput ikkussorneqassallutillu. Isumannaallisaanikkut

peqqissutsikkullu ulorianarsinnaagunik, tamanna pissutsillu allat isiginiarlugit inissinneqassapput, taamaalillutik ajutoortoqarnerani sapinngisamik ulorianannginnerpaassammata.

Imm. 3. Teknikkikkut iluaqusersuutit atortullu innaallagissamoortut piffimmi gassit, pujoralaat aalarluunniit pissutigalugit ikuallattoorfiusinnaasumi qaartoorfiusinnaasumiluunniit inissinneqarsimagunik. sumiiffinni qaartoorfiusinnaasuni atorneqarnissaminnut naleqquttuussapput.

§ 13. Matut, isaaviit, ammartartut il.il. inissinneqarneri, qassiuneri angissusaallu suliap suussusianut pissutsinullu allanut naleqqiullugit illersorneqarsinnaasuussapput. Taakku atortussanik naleqquttunik sananeqaateqassapput, imatullu ilusilersugaallutillu aaqqissorneqarsimassapput pisariitsumik ammarneqarsinnaasunngorlugit, matuneqarsinnaasunngorlugit ulorianaateqanngitsumillu saneqqunneqarsinnaasunngorlugit. Nipiliornermut, issimut, isugutammut, ikuallannermut il.il. naammaginatsumik ussissagaassapput.

§ 14. Sumiiffinni naleqquttuni allagartalersuinerit silamit ajoqusigaasinnaanngitsut inissinneqarsimassapput, taakkunatigut pissutsit isumannaallisaanermut peqqissutsimullu pingaaruteqartut paasissutissiisutigineqassallutik mianersoqqussutigineqassallutilluunniit.

Qaammaqqusersuineq

§ 15. Suliffik, sulliviit kiisalu isernermi aqquutit angallannermilu aqquutit naammattumik qaamanilinnik qullilersugaassapput. Ullup qaamarnga naammangippat, pissutsinut naleqquttunik qullilersugaassapput, sulineq angallannerlu illersorneqarsinnaasumik ingerlanneqarsinnaasunngorlugit.

Imm. 2. Qullilersuutit imatut inissinneqarsimassapput, qullilersuutit sulisut ajutoornerannik kinguneqarsinnaajunnaarsillugit.

Imm. 3. Suliffiit qullilersuinerup qamittoorneratigut sulisui uloriartorsiortitaappata, ajornartoornermi qullilersuutinik naammaginatsumik qaamaassusilinnik atortulersugaassapput. Taamatut iliornissaq ajornarpat, sulisut namminerisaminnik qaammartartoqartitaassapput.

Angallannermi aqquutit

§ 16. Suliffimmi aqquuserngit nunaminertallu angallaffiusussat naammattut aaqqissugaasimassapput, tassani angallanneq akornuteqanngitsumik ingerlassinnaanngorlugu kiisalu isumannaallisaanermut peqqissutsimullu ulorianartorsiortitsinngitsumik, aamma pisariaqarfiini teknikikkut iluaqusersuutinik atuiffiusinnaanngorlugit angissusiligaassapput pissusiligaallutillu.

§ 17. Angallannermi aqquutit isernermilu aqquutit, majuartarfiit, allunaasanik majuartarfiliat aalajangikkat, usilersortarfiit qaqisarissallu imatut naatsorsorneqarsimassapput, angissusilerneqarsimassallutik inissinneqassallutillu, pisuinnarnit angallassissutinilluunniit atuisunit isumannaatsumik aamma atorneqarnissaminnut naapertuuttumik ajornaatsumik atorneqarsinnaasunngortillugit.

Imm. 2. Inunnik angallassinermut nassiussanilluunniit assartuinnermut angallannermi aqputit amerlanerpaanik atuisunut suliallu suussusianut naleqquttumik angissusilerneqarsimassapput.

Imm. 3. Angallannermi aqputit nunaminertallu nunaminertanit sanilerisaminnit qaffasinnerusunngorlugit qullarneqarsimasut naleqquttunik assiaqutsersugaassapput.

Imm. 4. Angallassissutinik angallannermi aqputit matunit, isaavinnit, pisuinnaat ingerlaffissaannit, torsuusarsuarnit, majuartarfinnit assigisaannillu naammattumik ungasissuseqartumi inissinneqassapput.

Imm. 5. Angallassissutinik sulinermi atorneqartartunik ingerlaartoqartarpat, angallassissutinik ingerlasut pisuinnaallu nalinginnaasumik avissaarsimatinneqassapput.

Imm. 6. Isumannaatsumik sumiissusersiorsinnaaneq angalasinnaanerlu eqqarsaatigalugit pisariaqartinneqarpat angallannermi aqputit nunaminertallu suup tungaanut ingerlaviusinnaanerit, anillaffissat portussutsillu nikeriataarfigisaat erseqqissumik nalunaaqutsersorneqarsimassapput.

Imm. 7. Angallassissutit maskiinalluunniit suliffinnut appakaateqqusaappata angallannermi malittarisassat aalajangersarneqassapput.

§ 18. Nunami assallugit itersaliani salliarnartaliat angallannermilu aqputit aalajaatsussapput, maskiinanullu taakkunani atorneqartunut naleqquttuussallutik. Maskiinat isumannaatsumik nuunneqarsinnaanngorlugit taakku sananeqarsimassapput aserfallatsaalineqassallutillu. Sivingarnit itersallu immikkat aalajaatsunngorlugit suliarineqassapput.

Suliffik

§ 19. Ataasiakkaat suliffii naleqquttumik aqqissugaassapput, ima initutigissallutik pequtit pisariaqartut, iluaqusersuutit atortussallu illersorneqarsinnaasumik akunnilerlugit inissinneqarsinnaassallutik, taamaasilluni ingerlatat sulinnermut attuumassuteqartut tamarmik isumannaatsumik ingerlanneqarsinnaalersillugit sulinnermilu inissisimanerit aalanerillu illersorneqarsinnaasumik inissalerlugit.

Imm.2. Suliaq ingilluni suliarineqarsinnaappat naleqquttuullunilu, taamatut suliffissaq naleqquttumik aqqissugaq pigineqassaaq. Nikorfalluni pisullunilu sulisaraanni, ajornangippat issiavissaqassaaq, sulinerup uninnganerani atorneqarsinnaasunik.

Imm. 3. Suliffik illersorneqarsinnaasumik iserfissaqassaaq tassanngaanniillu illersorneqarsinnaasumik qimaariarfissaqassalluni.

§ 20. Suliffik sulisut suliffimmi sulinnermiluunniit ingerlatseriaatsini akuutissanit atortussanillu, sakkortuumik issimit kiammillu, nipiliornerit sajukulaarnernilluunniit il.il. peqqissutsimut ajoqutaasumik sunnerneqarsinnaajunnaarsillugit inissinneqarsimassallunilu aqqissorneqarsimassaaq.

Imm. 2. Atortussanik tunillaassuussinnaasunik imaluunniit akuutissanik atortussanilluunniit isumannaallisaaneq peqqissuserluunniit mianeriniarlugit amermit

peerasuarnissaat pingaaruteqartunik, imaluunniit siaruaannissaasa pinngitsoortinneqarnissaanik pingaaruteqartunik mingutsitsisoqarnissaanik aarlerinaateqarfiusuni, suliffiup eqqaani tamatumunnga iluaqusersuutunik naleqquttunik naammattunillu peqassaaq, soorlu puiaasanik isinik errortuummik imalinnik, ajornartoornermi qorlortitsivigaluni uffarfinnik immikkullu saligutitut atortunik allanik.

§ 21. Suliffik torersuullunilu ilisaajagaasimassaaq, pissutsit isumannaallisaanikkut peqqissutsikkullu illersorneqarsinnaajuaqqullugit. Makku pingaarnerutillugit maluginiarneqassapput:

1. aqqusernit nunaminertallu angallaffiusut, teknikkikkut atortulersuutitut ikkussukat isumannaallisaanarlunilu iliuutsit illersorneqarsinnaasumik pissuseqartinneqarnissaat,
2. atortussat, sakkuutit, ledningit il.il. sulinermi angallannermiluunniit ulorianartorsiortitsisinnaajunnaarsillugit inissinneqarnissaat,
3. aqquserngit nunaminertallu angallaffiusut aamma suliffiit eqqagassanik assigisaannillu nakkaatitsivigineqannginnissaat, kiisalu apinerani issilerneranilu aputaajarneqartarnissaat ujaraararterneqartarnissaallu, aamma
4. eqqakkat assigisaallu naleqqutumi inissinneqarallartarnissaat illersorneqarsinnaasumillu iginneqartarnissaat.

Imm. 2. Pujoralaat peqqissutsimut ajoqutaasut allatigullu mingutsitsinerit siammarneqarsinnaajunnaarsillugit torersaaneq eqqiaanerlu ingerlanneqartassapput.

Imm. 3 Assaanermi piiakkanik, piiakkat sinnikuinik, eqqagassatut katersukkanik, ikuallatat arsakuinik katersukkanik katersukkanillu allanik katersuviit kinnganikunngortitsinermilu immertakkat patajaatsunngorlugit kiisalu isumannaallisaanermut peqqissutsimullu ulorianarunnaarsillugit ilusilersugaassapput, sanaartorneqassallutik, ingerlanneqassallutik aserfallatsaalineqassallutillu.

§ 22. Piffissani sivisunerusumi silami sulisoqarpat, sulisut silap allanngorarneranut illersorniarlugit iliuuseqartoqassaaq, soorlu tupermik, qulisamik illuaqqamilluunniit nappaanikkut.

Imm. 2. Sumiiffimmi pineqartumi piffissami sivisunerusumi sulinermik piiaanerpiaanngitsumik misissuinerpiaanngitsumillu ingerlatsisoqarpat, soorlu sullivimmi sulinermik, nakkutilliinermik allaffissornermillu sulisoqarpat, sulineq taamaattoq ininut aaqqissorneqarneri aalajangersimasunik suliffinnut piumasagaatinik eqqortitsisunut inissinneqassaaq. Tamanna ininut, illuaqqanut, qulisanut assigisaannullu aamma atuuppoq.

Silaannarissaaneq il.il.

§ 23. Suliffiit matoqqasut silaannarissaammik naammattumik annertussusilimmik pilersorneqassapput.

§ 24. Akuutissat ajoqutaasinnaasut silaannarmi katersuuppata, imaluunniit katersuussinnaappata, naleqquttunik iliuuseqartoqassaaq, makkuninnga qulakkeerinnittunik:

1. pineqartut puilaffimminni unitsinneqassapput, imaluunniit
2. pineqartut puilaffimminni katersorneqassapput imaluunniit peerneqarlutik, imaluunniit
3. akuutissat taamatut ittut katersuunnerat imatut kimikillisinneqassaaq, sulisut aarlerinartorsiorunnaarsillugit.

Imm. 2. Periutsikkut akuutissat ajoqutaasut imatut siammartinneqarsinnaasariaqarput, sulisut aarlerinartorsiorunnaarsillugit.

§ 25. Silaannarmi gassit pujoralaallu peqqissutsimut ajoqutaasut qaartoorsinnaasulluunniit annertussusaat ussissusaallu naliliiffiginiarlugit iliuuseqartoqassaaq.

Imm. 2. Nakkutilliinermi atortunik sumiiffinni aalajangersimasuni gassit eqiterunnerannik il.il. nammineerlutik ingerlaavartumillu nalunaarsuisartunik, kalerrisaarutunik nammineerlutik aallartittartunik, atortunut innaallagissamoortunut innaallagissap sarfaanik nammineerlutik unitsitsisartunik aamma motorinik orsutortunik nammineerlutik unitsitsisartunik ikkussuisoqassaaq.

§ 26. Silaannarmik qaartoorsinnaasumik peqarneranik pilersoqartarneranillu akiuiniarluni pitsaaliuiniarlunilu iliuusissat pisariaqartut tamarmik iliuuserineqassapput.

Imm. 2. Piffinni qaartoorfiusinnaasutut aarlerinaateqarfiusuni, silaannaap qaartoorsinnaasup ikummartittoornissaa pinngitsoortinniarlugu iliuusissat pisariaqartut tamarmik iliuuserineqassapput.

Qaartiterutissat innattaatillu

§ 27. Qaartiterutissanik innattaatinillu toqqortarinninneq, assartuineq atuinerlu aatsitassanut ikummatissanullu inatsit malillugu inunnit sulianik taamaattunik ilisimasalinnit pisariaqarneratullu akuerisaasunit isumagineqassaaq. Sulisut isumannaallisaanikkut peqqissutsikkullu ulorianartorsiortinnagit suliasat aaqqissuunneqarlutillu suliarineqassapput.

Imm. 2. Aatsitassarsiorfinni qaartoorsinnaasumik pujoralalinni qaartiterutissat innattaatillu aatsitassarsiorfinni assatanilu taamaattuni atorneqartussatut naatsorsuusat kisimik atorneqarsinnaapput.

Imm. 3. Innattaatinik innaallagissamoortunik atuinermi, kallilernissaa aarlerinaateqartillugu, kallernissaa sukkasuumik isumannaatsumillu aarlerisaarutigineqarsinnaassaaq.

Isumannaallisaanermik sulineq, assaaneq qillerinerlu il.il.

§ 28. Suliap isumannaallisaanikkut peqqissutsikkullu tamakkiisumik illersorneqarsinnaasumik suliarineqarnissaanut ujarassiornermut tunngasut, qaqqat sannaanut tunngasut pissutsillu allat attuumassuseqartut sulineq aallartinneqartinnagu pisariaqarneratut annertussusilimmik misissorneqassapput.

Imm. 2. Assaanermik, piiaanermik, qillerinermik assigisaannillu suliaqarnerit isumannaallisaaneq peqqissuserlu eqqarsaatigalugit suliffinni avatangiisit pillugit inatsimmi

malittarisassat nalinginnaasut nalunaarummilu matumani malittarisassat naapertorlugit tamakkiisumik illersorneqarsinnaasumik pilersaarusioneqassapput, aaqqissorneqassallutik suliarineqassallutillu.

Imm. 3. Suleriaatsit teknikkikkullu iluaqusersuutit naleqquttut nunap qaavata pissusia pissutsillu allat atuuttut isiginiarlugit atorneqassapput, matumani sumiiffimmi tassani ingerlatat allat, nunamik immikkut ajoqusiisinnaaneq silallu sunniisarnera ilanngullugit eqqarsaatigineqassallutik.

§ 29. Nakkaasoorsinnaaneq sulluliallu qilaavinik naakkaattoorsinnaaneq pinaveersaartinneqassapput. Qulisat paaaffiillu sinaasa portussusii sivingassusaallu nunap iluata pissusianut, nunap iluata suussusianut suleriaasissatullu pilersaarutigineqartunut naleqqussarneqassapput.

Imm. 2. Assaanermik paaanermillu suliaqarnermi nunap siunertarineqanngitsumik sisoorsinnaanerata nakkaasinnaaneralu pinaveersaartinneqarnissaat qulakkeerneqassaaq. Matumani pingaartumik makku ilanngullugit isiginiarneqassapput:

1. Assaanerit sivinganerni assiaqutsersugaanngitsuni ingerlanneqartut ulorianartumik sisoorsinnaajunnaarsillugit sivingassusilerneqartassapput.
2. Qaarsumit seqummakut ulorianartorsiortitsisinnaasut ingerlaannaq peerneqassapput, toqqissisimanartumillu qulakkeerneqarlutik. Suliaq aallartinneqartinnagu aallarteqqinneqartinnaguluunniit suliffinni qulisat sivingarnillu angallanermiluunniit aqqutit atortukunik ujaqqanilluunniit ataasiakkaanik katatanik peqarnermut misissorneqartassapput, pisariaqarpallu taakku piarneqarlutik.
3. Assaanerit imaluunniit kaanngarnikunik paaanerit siunertaanngitsumik aalajaakkunnaarsitsinermik pilersitsinermik kinguneqanngitsumik ingerlanneqassapput.
4. Assaanermik suliaqarneq naammassineqarniariartoq pilertornerpaamik qerattaqqusersuisoqassaaq, nunap iluata aalajaassusiata tamanna pisariaqarunnaarsissimanngippagu.
5. Sumiiffiit ujaqqanik nakkutigineqarsinnaanngitsumik nakkaaviusinnaasut nakkaattoorfiusinnaasulluunniit ingerlaannaq assiaqutsersorneqassapput. Sumiiffimmi nakkutilliisoqareersimatinnagu pisariaqartumillu saliisoqareersimatinnagu imaluunniit isumannaallisaasoqareersimatinnagu assiaqutsersuutit peerneqassanngillat.
6. Sivinganermit assaavimmilluunniit qimaariariataapallassinnaanermut periarfissaqartuaannassaaq.

Imm. 3. Sumiiffiit assat sulianut atatillugu iserfiusinnaasut nunap iluata patajaatsuunissaa eqqarsaatigalugu akuttunngitsunik misissorneqartassapput aamma qerattaqqusersuutit aserfallatsaalineqassapput isumannaallisaaneq pilersaarutaareersoq attassinnaajumallugu.

Imm. 4. Pissutsit immikkut ittut isumannaallisaanermik suliaqarnermut pingaarutillit nikinnissap tullissaanut ilimasaarutigineqartassapput allaganngorlugillu nalunaarsorneqartassallutik. Suliaq ingerlanneqartillugu uppersaart

suliffimmiitsinneqartassaaq.

§ 30. Itersaliorluni sulluliorlunilu qillerivinni qillerinermi kinaluunniit ulorianartoqarfiusumiissanngilaq, qillerummillu ingerlatsisoq ujaqqat tammikalaneranut illersuuserneqarsimassalluni.

Imm. 2. Qillerinermik ingerlatsinerni tamani ujaqqat pujoralaat peqqissutsimut ulorianartut sapinngisamik pilertornerpaamik piiarneqartassapput.

§ 31. Suliffigisaq nakkutigisaanngippat aamma ujaqqanut nakkarsinnaasunut nakkaasinnaasunulluunniit allatigut isumannaallisagaanngippat, aamma ujaqqanik nakkaasoqarsinnaalersitsisumik sullulialluunniit qilaavanik nakkaattoortoqarsinnaalersitsisumik nunap iluanut sunniuteqartumik sulinermi angallassitutunik atortunilluunniit allanik ingerlatsisup inigisaa, aquffigisaa allatulluunniit suliffigisaa ajornanngippat qulisaassaaq.

§ 32. Usinik nakkaatitsivinni aalajangersimasuni assequtsiussanik pilersitsisoqassaaq, assartuutit usiminnik nakkaatitsinerminni ilanngullutik nakkaqataasinnaajunnaarsillugit.

Nunap iluani silaannarissaaneq

§ 33. Nunap iluanut iserfiusinnaasut tamarmik naammattumik silaannarissarfilersorneqassapput. Silaannarissarfeqarnissamik pisariaqartitsineq silaannarissarfeqarfiillu ilusiligaanerat sulinerup aallartinneqannginnerani pilersaarusiorneqarlutillu uppersaasersorneqassapput. Silaannarissarfeqarfik angallaffiusuni suliffiusunilu silaannaq naammaginartumik pitsaassuseqalersillugu annertussusilerneqassaaq.

Imm. 2. Tulliuttut qulakkeerniarlugit ataavartumik naammattumillu annertussusilimmik silaannarissaasoqarnissaa isumagineqassaaq:

- 1) silaannarik,
- 2) qaartoorsinnaaneraniq pujoralattoortoqarsinnaaneraniillu aarlerinaatit nakkutigisinnaajumallugit silaannaq, aamma
- 3) suliap ingerlanneqarnerani sulinermi atukkat naammaginartuusinnaaqullugit silaannaq, suleriaatsit atorneqartut sulisullu timikkut assoroortinneqarnerat isiginiarlugit.

Imm. 3. Silap nammineq suernerata silaannarissaanera piumasaaqatinik eqqortitsinngippat, silaannarissarfiit motorillit atorlugit silaannarissaaneq qulakkeerneqassaaq. Silaannarissaaveqarfik nakkutilliinermi kalerrisaarummik atortulerlugu suliarineqassaaq, taannalu silaannarissaanerup amigarneranik qulliit ikittaarnerisigut aamma/imaluunniit nipiliornikkut takutitsisinnaassaaq.

Imm. 4. Ajornartoornermi silaannarissarfik ingerlatsinerup piareersarneqarneranik suliaqarnermi aamma matusinermik suliaqarnermi, kiisalu sumiiffinnut silaannarissaasoqarfippiaap silaannaata ingerlaarfiinut toqqaannartumik atassutilinnut ingerlasussatut killilerneqassaaq. Tunisassiorfiit ajornartoornermi silaannarissarfimmik silaannarissarfilerneqarsinnaapput, sulisut isumannaatsuunissaat peqqissusiallu qulakkeerniarlugit naleqquttunik ilassutaasunillu iliuuseqartoqarsimappat.

Imm. 5. Silaannarissaaveqarfik ingerlaavartumik misissorneqartassaaq aserfallatsaalineqartassallunilu. Silaannarissaatinut piumasaqaatit akuttunngitsumik uuttortarneqarlutillu nalunaarsorneqartassapput.

Kapitali 4

Ikuallattoornissamut qaartoortoqarnissaanillu aarlerinaatit aamma qimaanermi aqqudit il.il.

Ikuallattoornissamut qaartoortoqarnissaanillu aarlerinaatit

§ 34. Ikuallattoornerit qaartoornerillu pilersinnissaat siaruarnissaalluunniit pinngitsoortikkumallugu malittarisassat pisariallit suliffeqarfanni tamani aalajangersarneqassapput. Ikuallattuulernerit qaartoornerillu pilertortumik sunniuteqarluartumillu unitsinneqarsinnaassapput.

Imm. 2. Suliffeqarfanni tamani ikuallattoqalernerani, qaartoortoqarnerani nakkaattoqarnerani aamma gassinik peqqinnissamut ulorianaatilinnik aniasoqalerneranik kalerrisaarutit pigineqassapput.

Imm. 3. Pujoralaat imaluunniit qaarusuliani gassit ikuallajasut pujoralannik qaartooriaannarnut allanut siaruaassinnaasut nutaanik qaartoortitsisinnaasut killilersimaarneqassapput qaartoornissanut assiaqutsilersuinikkut. Assiaqutit taamaattut inissinneqarnerat allallugit uppernarsaaserneqassapput akuttunngitsumillu allattorneqaqqittassallutik suliffeqarfimmilu pissarsiarineqarsinnaassallutik.

Imm. 4. Stoffit atortullu nunap iluaniitut annertussusii pisariqarluinnartunuinnaq killilersimaarneqassapput.

§ 35. Motorit orsussartortut nunap iluani atorneqartut akuttunngitsumik misissorneqartassapput pisariaqartitsinerlu malillugu nalerisarneqartassallutik. Misissuinerit nalerisaanerillu allattuiffimmu allattorneqassapput.

Imm. 2. Benzin imaluunniit gas motorinut orsussatortunut nunap iluani atorneqartunut orsutut atorneqassanngillat. Inerteqqut taanna angallassisutitut annaassiniutaasunut atuutinngilaq, aatsitassarsiorfimmu taakku akuttunngitsumik atorneqartanngippata.

§ 36. Innermik atuneq kiisalu ikummartitsisinnaasunik sulineq inerteqqutaapput, ikuallattoqarsinnaanera qaartoortoqarsinnaaneraluunniit pinaveersimatinniarlugit naammaginarlumik iliuseqartoqarsimanngippat. Sumiiffinni ikuallattoorfiusinnaasuni qaartoorfiusinnaasunilu pujortarneq inerteqqutaavoq.

Imm. 2. Nunap iluani, assatani ujaqquerivinniluunniit qaartoorsinnaasumik gasseqartuni pujoralaqartuniluunniit tupanik pujortagassanik kiisalu sunilluunniit innaallatsitsisinnasunik ikummartitsisinnasunilluunniit nassataqarnissaaq inerteqqutaavoq.

§ 37. Sumiiffinni qaartoorsinnaasunik gasseqartuni pujoralaqartuniluunniit innermik supoortoq atorlugu saviminernik agguineq, svejserineq taakkuluunniit assigisaannik suliaqarneq qaqutigunnaq ingerlanneqarsinnaavoq, sulisullu isumannaatsuunerat peqqissusiallu illersorniarlugit immikkut iliuseqartoqassalluni.

Imm. 2. Imerpalasut naqitsiniliuutit, tassa imaappoq imerpalasut naqitsinertut nukinngortitsisinnaasut atorneqarnissaat pisariaqarpat, imerpalasut ikikkaruminaatsut sapinngisamik atorneqarniassapput, ikuallattoorsinnaaneq innerullu siaruaassinnaanera pinngitsoortinniarlugit. Imerpalasut naqitsinertut nukinngortitsisinnaasut innermut akiuussinnaanermut misiliinermi piumasaqaatit immikkuualuttulersugaasut eqqiluusaarnissarlu eqqarsaatigalugu piumasaqaatit eqqortissavaat.

Imm. 3. Imerpalasut naqitsinertut nukinngortitsisinnaasut piumasaqaatinut assigiinngitsunut naapertuuttuunngitsut atorneqarpata. suli annertunerusumik iliuseqartoqassaaq, ikuallattoorsinnaaneq innerullu siaruaassinnaanera pinngitsoortinniarlugit.

§ 38. Suliffiit qatserinermi atortunik naammattunik pilersorneqarsimassapput, pisariaqarpallu ikuallannernik malussarniutinik kalerrisaarutinillu atortulersorneqarsimassallutik. Qatserinermi atortut biilini orsussamik ingerlatilinni, maskiinani sulinermilu atortuni annerusuni kiisalu sumiiffimmi immikkut ikuallajasulinni qitiusumik naleqquttumillu inissinneqarsimassapput. Assammik qatserutit tigeriaannaassapput, pisariitsumik atorneqarsinnaassallutik illersorneqarsinnaasumillu toqqortarineqassallutik.

Imm. 2. Qatserinermi atortut nalunaaqutsersugaassapput. Atortut aserfallatsalineqassapput, aamma qaqugukkulluunniit atorneqarnissaminnut piareersimatinneqassallutik.

Qimaanermi aqutissat ajornartoormilum aneriarfissat

§ 39. Sulisut ulorianartorsiornermi suliffitik sukkasuumik isumannaatsumillu qimassinnaasussaavaat. Qimaariarfissat ajornartoormilum aniffissiat erseqqissumik nalunaaqutsersugaassapput, assersorneqaratik akornuteqaanngitsumillu qaangerneqarsinnaassallutik sapinngisamillu toqqaannartumik silamut imaluunniit immikkoortumut inimulluunniit annanniarfiusumut aniffiusinnaassallutik.

Imm. 2. Sulisut isumannaatsuunerat peqqissusiallu annertuumik ulorianartorsiorinneqarpata ingerlatsineq unitsinneqassaaq, sulisullu sumiiffimmut isumannaatsumut qimarnunneqassallutik.

§ 40. Suliap suussusia pissutsillu allat apequtaatillugit qimaanermi aqutissat ajornartoormilum aneriarfissiat naammattunik amerlassuseqartut suliffimmiittut tamarmik ulorianartorsiornermi sulisut silamut sumiiffimmulluunniit isumannaallisaaviusumut isumannaatsumik anisinnaangorlugit ilusilersorneqarsimasut, angissusilerneqarsimasut inissinneqarsimasullu pigineqassapput.

Imm. 2. Tamanna ajornanngippat nunap iluani suliffiit tamarmik immikkut marlunnik anisariaqartinneqassapput, tamarmik immikkut nunap qaanut ingerlaviusinnaasunik avissaartitanik aqutissalinnik. Anisarissat atorneqarnerat timikkut sakkortuumik assoroormik nassataqarpat anisarissat taakku sulisut assartornissaannut iluaqusersuutinik ilaneqassapput.

Imm. 3. Tamanna isumannaallisaanermut tunngasut pissutigalugit pisariaqartinneqarpat,

ajornartoornermi aneriarfissat isaaviilluunniit matui qimaaffiup tungaanut ammartartuussapput, aamma ajornanngitsumik isumannaatsumillu matuersaat atornagu ammarneqarsinnaassallutik, kiisalu illersittakkanik kaajallattartunilluunniit matulernerqarsimassanatik.

Imm. 4. Qimaanermi aqutissat ajornartoornermilu aneriarfissat qaammaqquteqartariaqartut ajornartoornermi qullernik innaallagissap sarfaarunnerani naammattumik sakkortussusilimmik qaamanilinnik pilersorneqarsimassapput.

Annaassiniarnermi atortut

§ 41. Qimaanermi annaassiniarnermilu atortunik pisariaqartunik peqarnissaa taakkulu aserfallatsaalineqarnissaat sulisitsisup isumagissavaa.

Imm. 2. Sulisut pisuni ajornartoorfiusuni iliuusissat naleqquttut iliuuserissalugit ilinniartinneqarlutillu ilitsersorneqassapput.

Imm. 3. Annaassiniarnermi atortut sumiiffinni naleqquttuni tigorianaannangorlugit pigineqassapput nalunaaqutsersorneqarsimassallutillu. Atortut taakku aserfallatsaalineqassapput aamma qaqugukkulluunniit atorneqarnissaminut piareersimassallutik.

Ikiueqqaarnerq

§ 42. Ikiueqqaarnermi atortut sumiiffinni sulinermi pissutsit pisariaqalersitsiviini tamani tigorianaannaassapput.

Imm. 2. Sulisut silaannarmit peqqissutsimut ajoqutaasumit sunnerneqarsinnaappata, anersaartuutitut uummarsaanermilu atortut pigineqassapput.

Imm. 3. Sulisut naammattumik amerlassusillit ikiueqqaarnermi atortut atornissaannik ilitsersorneqarsimassapput.

Imm. 4. Suliffiup angissusiata, suliap suussusiata ajutoorsinnaanerullu tamanna pisariaqalersippassuk, init ikiueqqaarfissat ataaseq arlalilluunniit ikiueqqaarnermi atortunik atortulersukkat akiutinillu atuinissamut naleqqussarneqarsimasut aaqqissorneqassapput.

Imm. 5. Inini taakkunani tamanit takuneqarsinnaasunik allagarsersuinikkut qanoq ikiueqqaarnissaq ilitsersuutigineqassaaq.

Imm. 6. Init ikiueqqaarfiusussat erseqqissumik nalunaaqutsersimassapput.

Upalungaarsimaneq aaqqissuussaanerlu

§ 43. Sulisilluni ajutoortoqassappat, ikuallattoqassappat, qaartoortoqassappat nakkaattoortoqartillugu il.il. upalungaarsimanissamut pilersaarutip pigineqarnissaa sulisitsisup isumagissavaa. Pilersaarut suliffinni allannguuteqartoqaraangat ingerlaavartumik nutarterneqartassaaq.

Imm. 2. Upalungaarsimanissamut suleqatigiiffik atorsinnaasoq annertuumik ajutoornerni pisoqarnerniluunniit tamani iliuusissanik naleqquttunik pilertortumik sunniuteqarluartumillu

iliuseqarsinnaasoq pilersinneqassaaq.

Imm. 3. Nunap iluani sumiluunniit ikiuisinnaassagaanni, upalungaarsimanermit suleqatigiiffimmi annaassiniartartut sungiusarsimasut naammattunik amerlassusillit atortullu naleqquttut ilaassapput.

Imm. 4. Suliffinni tamani nalinginnaasumik inuttaqartotaasuni, upalungaarsimanissamut akuttunngitsumik sungiusartitsisoqartassaaq.

Kapitali 5

Ajutoornermik nalunaarutiginninneq

§ 44. Suliffeqarfiup suliffimmi isumannaallisaanerup peqqissutsillu naliliivigineqarnerannik suliaqartussaataasup, tak. § 3, sumiiffimmi ajutoornermik annertuumik nassataqartumik nassataqarsinnaasimasumillu ajutoortoqarpat tamanna Sullivinnik Nakkutilliisoqarfimmut ingerlaannartumik nalunaarutigissavaa.

Imm. 2. Sulisitsisut sulisilluni ajutoornermik il.il. nalunarutiginninnissamut allatigut pisussaaffiisa allanngornerannik kinguneqanngilaq.

Kapitali 6

Peqqissutsimik misissuinerit sunnerneqarsimasunillu nalunaarsuineq

§ 45. Sulisut peqqissutsikkut ajoqusiisumik sunnerneqarsimasinnaasut sulileqqinnginnerminni peqqissutsimikkut misissorneqarnissaminnut periarfissaqarnisaat, pisariaqarpallu akuttunngitsumik akuttunerpaamillu ukiut pingasukkaarlugit misissorneqartarnissaat sulisitsisup qulakkiissavaa, imaappat:

- 1) Sunniineq nappaammut suussusersineqarsinnaasumut peqqissutsilluunniit ajorseriarneranut atassuteqartoq takuneqarsinnaappat,
- 2) nappaat sunniinerluunniit pissutsit sulisut atugaat pissutigalugit pilersinnaasoq ilimanaateqarpat,
- 3) misissueriaaseq atorneqartoq sulisumut annikitsuinnarmik ulorianarsinnaappaat, aamma
- 4) nappaat sunniulluunniit takuneqarsinnaasunngortinniarlugu periutsit sunniuteqarluartut pigineqarpata.

Imm. 2. Misissuinerit sulisumut isertitatigut annaasaqaataanatik ajornangippallu piffissap suliffiusup nalaani ingerlanneqarsinnaanerit sulisitsisup isumagissavaa.

§ 46. Sulisitsisup allataavinni sulisut nalunaarsussavai, suliaasa suussusii qanorlu sivistigisumik sulisimanerat kiisalu tamatumunnga atatillugu akuutissanit atortussanillu ulorianartunit sunnerneqarsimanerat nalunaarlugit. Sullivinnik Nakkutilliisoqarfik nakorsarlu misissuisoq allattaavinnik taakkuninnga misissuisinnaatitaapput. Sulisut inuit pillugit paasissutissanik allattaavimmi allanneqarsimasunik misissuisinnaatitaapput. Sulisut taakkulu suliffeqarfimmi sanaartorfimmiluunniit sinniisaat, allattaavinni ataatsimut

paasisutissanik pineqartut kinaassusiinik ilisarnarunnaarsinneqarsimasunik misissuisinnaatitaapput.

Imm. 2. Allataaviit taakku sunniinerup qaangiunnerata kingornatigut sivikinnerpaamik ukiuni 40-mi toqqortarineqassapput. Suliffeqarfiup atorunnaarnerani allattaaviit najukkami Sullivinnik Nakkutilliisoqarfimmut nassiunneqassapput.

Kapitali 7

Immikkut akuersissuteqartarneq naammagittaalliernerlu

§ 47. Sullivinnik Nakkutilliisoqarfiup pisortaata pissutsinik immikkut ittunik atuuttoqartillugu taamaaliernerlu naleqquttutut tamakkiisumillu illersorneqarsinnaasutut nalilerneqarpat, nalunaarummi matumani aalajangersakkat atuutinnginnissaat immikkut akuersissutigisinnaavaa.

§ 48. Nalunaarut manna tunngavigalugu aalajangiinerit Kalaallit Nunaanni sullivinni avatangiisit pillugit inatsimmi § 64 malillugu naammagittaalliuutigineqarsinnaapput.

Kapitali 8

Pinerluttulerinermik inatsit malillugu pineqaatissiinerit

§ 49. Kinaluunniit Kalaallit Nunaanni pinerluttulerinermik inatsit tunngavigalugu pineqaatissinneqarsinnaavoq

- 1) § 3-mik aamma §§ 7-47-imik unioqqutitsisoq
- 2) nalunaarut manna tunngavigalugu peqqusissutinik inerteqqutinilluunniit malinninngitsoq imaluunniit
- 3) nalunaarut tunngavigalugu immikkut akuersissuteqarnermi piumasaqaatinik sumiginnaasoq.

Imm. 2. § 3-mik aamma §§ 7-46-imik unioqqutitsinermi sulisitsisoq akiliisitaanissamut akisussaatinneqarsinnaavoq, unioqqutitsineq sulisitsisup piaaraluni mianersuaalliorluniluunniit unioqqutitsineratut isigineqanngikkaluarpalluunniit. Akiliisitaanissamut akisussaasuutitsinermi pillaatip allannguutissaanik aalajangersaasoqassanngilaq.

Imm. 3. Ingerlatseqatigiiffiit il.il. (inatsisitigut pisinnaatitaasut pisussaataasullu) pinerluttulerinermik inatsimmi kapitali 5-imi maleruagassat tunngavigalugit pinerluttulerinermi inatsisitigut akisussaatinneqarsinnaapput.

Kapitali 9

Atuutilersitsineq

§ 50. Nalunaarut 1. april 2015-imi atuutilerpoq.

Imm. 2. Aatsitassanik piianeq il.il. ulloq taanna sioqqullugu aallartinneqarsimappat, nalunaarut 1. april 2017-imi aatsaat atuutilersinneqassaaq.

Sullivinnik Nakkutilliisoqarfik, ulloq 26. marts 2015

PETER VESTERHEDEN

/ Eva Jensen